

Suđenje i optužnice za izborne prevare u Brčkom

Pred Osnovnim sudom u Brčkom počelo je suđenje Elviru Saletoviću i Sanelu Pengiću, optuženim za planiranje, udruživanje i organizovanje najmanje pet osoba radi trgovanja glasovima na Lokalnim izborima 2020.

Na suđenju su svjedočili kandidat na prošlim lokalnim izborima Abdulah Iljazović i dvojica inspektora Policije Brčko distrikta koji su učestvovali u hapšenju Saletovića i Pengića tokom primopredaje novca za kupovinu glasova. Tužilac Vladimir Tepavčević je za Centar za istraživačko novinarstvo (CIN) rekao da će na narednim ročištima biti izneseni dodatni dokazi tužilaštva i saslušan snimak primopredaje novca.

„Mislim da imamo solidne dokaze da bi, po našem, iskreno, trebala biti neka osuđujuća presuda“, rekao je tužilac Tepavčević.

Pengić i Saletović se terete za povredu slobode u odlučivanju birača koja se kažnjava novčano ili kaznom zatvora do tri godine.

Njihovu mrežu trgovanja glasovima su nekoliko dana uoči izbora razotkrili novinari CIN-a. Predstavljajući se kao stranački aktivisti, novinari su ugovorili da se Saletović i Pengić sastanu sa kandidatom stranke Narod i pravda Abdulahom Iljazovićem kako bi dogovorili kupovinu 130 glasova za 6.500 maraka.

Na sastanku, kojem je uz Iljazovića prisustvovao i novinar CIN-a, dogovorena je primopredaja prvog dijela od 1.300 maraka u apoenima po 10 maraka. Glasači koje su Saletović i Pengić pronašli u brčanskim mjestima trebali su dobiti po jednu novčanicu koju bi fotografisali pored zaokruženog glasačkog listića i poslali trgovcima kao dokaz o urađenom poslu.

Iljazović je novac po dogovoru predao nekoliko dana kasnije, a dva dana uoči izbora i ostalih 5.200 maraka. Na dan primopredaje drugog dijela novca Saletović i Pengić su uhapšeni i određen im je pritvor. Kod Saletovića su pronađeni spiskovi sa imenima glasača i novac.

Novinari CIN-a razotkrili mrežu trgovaca glasovima

Optužnice za glasanje izvan BiH

Zbog pripreme izbornih prevara u Brčkom nedavno su optuženi i Pejo Mendeš i Mato Gluhaković. U optužnici je opisano da su pribavljali tuđe lične dokumente kako bi prevarom glasali u njihovo ime za Mendeša, tadašnjeg kandidata Hrvatske seljačke stranke za Skupštinu Brčko distrikta.

Gluhaković i Mendeš su fotografisali dokumente i bez znanja tih osoba dostavljali ih Centralnoj izornoj komisiji Bosne i Hercegovine (CIKBiH) kao obrazac za prijavu za glasanje izvan BiH.

Novinari CIN-a su tokom istraživanja pronašli da je Mendeš pokušao osigurati glasove za sebe i preko sugrađanina Jasmina Ravkića. Ravkić je sredinom 2020. godine osuđen na tri mjeseca zatvora zbog ilegalne sječe šume, a Mendeš mu je obećao osigurati zamjenu zatvora za društveno-korisni rad, baš kao što je ranije učinio njegovom rođaku Raifu Ravkiću. Dogovorili su se da Jasmin nabavi podatke iz ličnih karata svojih komšija i članova uže porodice kako bi ih Mendeš na izborima zloupotrijebio za glasanje van BiH. Lažne glasače bi njegova stranka prijavila za glasanje putem pošte iz Srbije i Hrvatske kako bi dobili glasačke listiće, ali listići ne bi stigli na prijavljene adrese u inostranstvu, već u sjedište stranke.

„Lično sam bio s njim i Pejom Mendešom kad su pričali. On je rekao Peji: ‘Probaj pomoći, a ja ću ti 50 ličnih karti sabrati za glasanje’. Razumijete?“, govorio je tada Raif Ravkić novinarima CIN-a.

Tri mjeseca pred Lokalne izbore 2020 Jasmin Ravkić je na prevaru dobio brojeve ličnih karata najmanje 20 komšija, uključujući i njegove roditelje. Rekao im je da mu trebaju jer skuplja potpise za peticiju kojom bi mu zatvorska kazna bila preinačena u društveno-korisni rad. U želji da pomognu rado su učinili što je od njih tražio, ne znajući da će ti podaci završiti na biračkim spiskovima za glasanje iz inostranstva.

Osnovni sud u Brčko distriktu je potvrdio optužnicu koja Mendeša i Gluhakovića tereti za pripremanje krivičnog djela te primanje nagrade ili drugog oblika koristi za trgovinu utjecajem za što je zapriječena minimalna zatvorska kazna od tri godine.